

FJALA E DEPUTETIT ERVIN SALIANJI

E ENJTE 10 SHKURT 2022

Pa diskutim, nëse do të kishim mundësi për ta ndërprerë votimin dhe për ta rikthyer të gjithë procesin e reformës në drejtësi, edhe mund të isha një ndër ata që do të votoja. Por nëse ka dikush që duhet të jetë përgjegjës në këtë sallë të këtij parlamenti për dështimet e reformës në drejtësi, për dhënien Xhorxh Sorosit, dreqit dhe të birit, pa diskutim, jo ne nuk kemi qenë për ta votuar, por përgjegjësit drejtpërdrejt për çdo centimetër që kontrollon Edi Rama të reformës në drejtësi, duhen gjetur tek ajo pjesë që e ka votuar me 140 vota dhe që, madje, ka zgjedhur, t'ua thotë të vërtetat në sy shqiptarëve, gjysmat e komisionerëve të vetingut, të këtyre komisionerëve që janë sot, dhe një pjesë e deputetëve janë aty sot, duke thënë se kjo i shërben Edi Ramës.

Edi Ramës i shërben të thuash: që të mos ketë Operacioni Ndërkombëtar i Monitorimit sot asnjë akses, të mos kenë Shtetet e Bashkuara sot asnjë akses, të mos ketë Bashkimi Europian sot asnjë akses, të mos ketë ambasada gjermane asnjë akses, të mos kemi asnjë marrëdhënie me asnjë tjetër dhe ta luftojmë Edi Ramën, me çfarë, me mullinj të erës? Po pse kërkohet sot, kur jemi në një situatë, ku një pjesë nuk ka marrëdhënie, për faj të dikujt a të dikujt tjetër, me Shtetet e Bashkuara të Amerikës, të zhysim të gjithë Partinë Demokratike? Po cila na qenka kjo arsye? Cila është kjo arsye madhore dhe cili është interesi i Partisë Demokratike, kur asgjë në këtë vend dhe asgjë, edhe nga kjo anë e parlamentit, nga Partia Demokratike, nuk është bërë pa mbështetjen e Shteteve të Bashkuara të Amerikës? Kështu që duhet t'i themi të vërtetat siç janë. Po, ka probleme sot drejtësia! Po, Edi Rama është i kapur në segmente nga drejtësia! Nëse ka përgjegjës për kapjen e drejtësisë nga Edi Rama, për aq sa e ka kapur, pa diskutim është nga parafolësit.